



Uunga

Jens Napâtok`, Naleraq
Inatsisartunut ilaasortaq

§37 apeqqummut nr. 88-mut akissuteqaat

Asasara Jens Napâtok`,

Inatsit tunngaviusussamik pillugu Isumalioqatigiissitat pillugu Inatsisartut suleriaasianni §37, imm. 1 naapertorlugu Naalakkersuisunut apeqquteqarputit. Akissuteqaatit apeqqutit kingornagut atuarneqarsinnaapput.

1. Qanga kingullermik isumalioqatigiissitat sulinerup killiffianik inatsisartunut Naalakkersuisunullu pappiaranngorlugit ilisimatitsippat?

Akissut: Inatsit tunngaviusussaq pillugu Isumalioqatigiissitat ingerlaneranut nalunaarusiaq kingulleq 1. april 2022 Naalakkersuisut Siulittaasoqarfianut nassiunneqarpoq.

2. Tunngaviusumik inatsisissap suliarinerani tunngavissat qassit suliarineqarpat?
 - a) Tunngavissanik arlariinnik sulisoqarpa?
 - a.1) Tassani pineqarput toqqaannartumik naalagaaffinngornissaq tassalu Naalagaaffik Kalaallit nunaat?
 - a.2) Imaluunniit aamma sulisoqarpa Kunneqarfiup ataani Namminersulernissamik anguniagalinnik?

Akissut: Inatsit tunngaviusussaq pillugu Isumalioqatigiissitat missingiummik isumaliutissiissutitalimmik ataatsimik inatsit tunngaviusussamik suliaqarput.

3. Suliaq killiffianik qaqugu innuttaasut nunarfinni illoqarfinnilu ataatsimiititsisaqattaarnikkut malinnaatinneqassappat isummersornissaminnut isumalioqatigiissitat tunngavissanik suliaqarnerani aallaaviit innuttaasunut oqallissutigittissallugit?

Akissut: Innuttaasut tamarmik, tassani meeqqat, inuusuttut inersimasullu Tunngaviusumik Inatsisissaq pillugu Isumalioqatigiissitamut siunnersuutunik nassiussisinnaanermut pisinnaatitaapput. Isumalioqatigiissitami ilaasortat, siulittaasoqarfik aaliangeeqataasinnaatanillu ilaasortat nammineq naliliinertik naapertorlugu siunnersuut suliarineqaqqinnissamut naapertuuttut isigineqarpat, Isumalioqatigiissitami siunnersuummik taamaattunik saqqummiussisinnaapput.

Isumalioqatigiissitaq nittartakkakut quppernermik pilersitsinikuuvoq, tassanilu isumalioqatigiissitat sulinerata ineriartornera ilisimatitsissutigineqartarluni.

11-05-2022
Suliap normua 2022 - 7606
All. nr. 19957512

Postboks 1015
3900 Nuuk
Tlf. (+299) 34 50 00
Fax (+299) 32 50 02
E-mail: govsec@nanoq.gl
www.naalakkersuisut.gl

Inatsit tunngaviusussamut missingiut suliarineqareerpat, Namminersorlutik Oqartussat missingiut illoqarfinnut nunaqarfinnullu tamanut anngunniassavaat. Namminersorlutik Oqartussat innuttaasut naapillugit siunnersuummik saqqummiussiffigineqarnissaat, paasissutissanullu, tunngaviusunik naleqartitanullu isumaliutinik isumalioqatigiissitap sammisimasaanut qisuariaatinik pissarsinissaq isumagissavaat. Namminersorlutik Oqartussat ataatsimiititsinerit nalinginnaasut, isumasioqatigiinnerit kiisalu tusagassiuutit muteerniusut qarasaasiatigullu naapiffiit il.il. sulinermi tassani atorsinnaavaat.

4. Suut isumalioqatigiissitami anguniagaanersut pillugit innuttaasunut qaammarsaammik aviisimik saqqummiussisoqarniarpa?

Akissut: Innuttaasunut tamanut akeqanngitsumik paasissutissiaqarpoq atuaganngorlugu naqitigaasimasumik. Aammattaaq aviisinngorlugu paasissutissiaqarpoq inoqutigiinnut agguanneqarnikuusumik.

5. Innuttaasut isummersornissaannut aamma TV-kkut filmeeranngorlugit isummersornissamik atugassanik saqqummiussisoqarniarnersoq ilanngullugu paaserusupparput.

Akissut: Tamanna pinikuunngilaq. Eqqaanneqassaaq Siulittaasoqarfik aalajangermat 25. martsimiit innuttaasunut paasisitsiniaanermi tunngasut tamarmik unitsinneqarmata taarsiullugulu Allattoqarfimmi nukiit tamarmik Inatsit tunngaviusussaq pillugu Isumalioqatigiissitat suliaasaannut atorneqassammata.

6. Tunngaviusumik inatsisissaq isumalioqatigiissitani suliarineqartoq kingusinnerpaamik qaqugu naammassissava?

Akissut: Inatsit tunngaviusussaq pillugu Isumalioqatigiissitaaq Kalaallit Nunaani inatsit tunngaviusussamut missingiummik kingusinnerpaamik ulloq 31. december 2022 Naalakkersuisunut tunniussissaaq. Kisianni Inatsit tunngavioq pillugu Isumalioqatigiissitaaq siulittaasoqarfiat piffissaliussaq ukioq ataatsimik affarmilluunniit sivitsorneqarnissaa qinnutiginiuuat.

7. Nunarput siammasissorujussuarmik inoqarfeqarpoq ilaatigut angallannermi tikikkuminaassinnaasartunik, taamaattumik innuttaasunut paasisutissanik qaammarsaanissallu pinngitsoorneqarsinnaanngitsut assersuutigalugu Aviisit TV-ikkut saqqummiussisarnissat qanoq pilersaaruteqarfigineqarpat?

Akissut: Namminersorlutik Oqartussat innuttaasunut peqataatitsinissamut iliusissamik piareersarlutik aallartinnikuupput. Iliusissap siunertaraa sapinngisamik innuttaasut tamarmik peqataatinnissat. Tamannalu ataatsimiititaliamit susassaqartumit taparserneqarsimavoq.

Inussiarnersumik inuulluaqqusillunga



Múte Bourup Egede
Naalakkersuisut Siulittaasuat